

四庫全書

史部

欽定四庫全書

史部  
金史卷六  
七

詳校官國子監祭酒<sub>臣</sub>覺羅善喜

內閣中書<sub>臣</sub>李彤覆勘

總校官舉人<sub>臣</sub>章維桓

校對官編修<sub>臣</sub>章宗瀛

謄錄監生<sub>臣</sub>吳映熙

欽定四庫全書

金史卷六

元中書右丞相總裁托克托等修

本紀第六

世宗止

世宗光天興運文德武功聖明仁孝皇帝諱雍本諱烏祿太祖孫睿宗子也母曰貞懿皇后李氏天輔七年癸卯歲生于上京體貌奇偉美鬚髯長過其腹曾間有七

子如北斗形性仁孝沉靜明達善騎射國人推為第一  
每出獵耆老皆隨而觀之皇統間以宗室子例授光祿  
大夫封葛王為兵部尚書天德初判會寧牧明年判大  
宗正事改中京留守俄改燕京未幾為濟南尹貞元初  
為西京留守三年改東京進封趙王正隆二年例降封  
鄭國公進封衛國三年再任留守徙封曹國六年五月  
居貞懿皇后喪一日方寢有紅光照室及黃龍見寢室  
上又嘗夜有大星流入留守第中是歲東梁水漲溢暴

至城下水與城等決女牆石罅中流入城湍激如涌城中人惶駭上親登城舉酒酌之水退海陵南伐天下騷動是時籍契丹部人丁壯為兵部人不願行以告使者使者蘇赫畏海陵不以告部人遂反至是咸平府穆昆瓜里攻陷韓州據咸平將犯東京八月起復東京留守博索路兵四百來會討瓜里復得城中子弟願為兵者數百人帝舅興中少尹李石以病免家居遼陽戊午發東京以石主留務賊覘者聞輦鼓聲震天見旌旗蔽野

傳言國公兵十萬且至賊衆至瀋州遯去會烏雅扎拉等敗賊兵還至常安縣海陵使博索路總管完顏默音來討賊以兵屬之九月至東京副留守高存福其女在海陵後宮海陵使存福伺起居適以造兵器餘材造甲數十存福宣言留守何為造甲密使人以白海陵遂與推官李彥隆託為擊毬謀不利存福家人以其謀來告平定知軍李富色克亦言其事海陵嘗聞上有疾即使近習來觀動靜至是又使摩囉歡圖淮北諸王上知之

心常隱憂及討瓜里還至清河遇故吏魯爾錦乘傳自南來具言海陵殺其母殺兄子塔納阿里布及樞密使布薩呼圖等又曰且遣人來害宗室兄弟矣上聞之益懼及聞存福圖已事且有迹李石勸上早圖之于是以議備賊事召官屬會清安寺彥隆先到存福累召始來並于座上執之是月復有雲來自西黃龍見雲中十月辛丑南征萬戶完顏福壽高忠建盧萬嘉奴等自山東率所領兵二萬完顏默音自長安率兵五千皆來附默音

即以臣禮上謁乙巳諸軍入城共擊殺存福等是夜諸軍被甲環衛皇城丙午慶雲見屬官諸軍勸進固讓良久于是親告于太祖廟還御宣政殿即皇帝位以完顏默音為右副元帥高忠建元帥左監軍完顏福壽右監軍盧萬嘉奴顯德軍節度使丁未大赦改元大定下詔暴揚海陵罪惡數十事己酉饗將士賜官賞各有差仍給復三年會寧呼爾哈率賓等路南伐諸軍會尚書省奏請以從軍來者補諸局司承應人及官吏關員上曰



舊人南征者即還何以處之必不可闕者量用新人可也辛亥以利涉軍節度使通吉義為叅知政事中都留守西北面行營都統完顏古雲將兵三萬駐歸化以為左副元帥丁巳出內府金銀器物贍軍吏民出財物佐官用者甚衆士戍以前臨潢尹晏為左丞相癸亥詔諭南京太傅尚書令張浩甲子興平軍節度使張玄素上謁尚書省奏正隆軍興之餘進錢粟者宜量授以官從之詔遣伊喇札巴招契丹諸部為亂者以前肇州防禦

使實圖美為元帥右都監十一月己巳朔以左丞相晏  
兼都元帥辛未以戶部尚書李石為叅知政事己卯詔  
調民間馬克軍用事畢還主死者給價阿蘇璋殺同知  
中都留守事薩勒扎阿蘇自稱中都留守璋自稱同知  
留守事使厚嘉努等來上表賀辛巳以如中都期日詔  
羣臣壬午詔中都都轉運使左淵曰凡宮殿張設毋得  
增置無役一夫以擾百姓但謹圍禁嚴出入而已以尚  
書石司員外郎完顏烏肯徹為詔諭高麗使癸未遣權

元帥左都監烏哲庫右都監實圖美廣寧尹布薩歡塔  
討契丹諸部甲申追尊皇考幽王為皇帝諡簡肅廟號  
睿宗皇妣富察氏曰欽慈皇后李氏曰貞懿皇后羣臣  
上尊號曰仁明聖孝皇帝乙酉追復東昏王帝號諡武  
靈廟號閔宗詔中外封子薩喇勒為許王呼塔噶為楚  
王戊子辭謁太祖廟及貞懿皇后園陵己丑如中都次  
小口使中都留守宗憲先往壬辰次梁魚務樞密副使  
北面行營都統白彥敬南京留守北面行營副統赫舍

哩志寧以所統軍數來上安武軍節度使爽來歸乙未  
完顏元宜等弑海陵于揚州丙申次義州丁酉宋人破  
陝州防禦使折可直降同知防禦使事李柔立死之十  
二月乙卯次三河縣左副元帥完顏古雲來朝丙辰次  
通州延安尹唐古德溫來朝丁巳至中都戊午謁太祖  
廟己未御貞元殿受羣臣朝庚申以元帥左監軍高忠  
建等為報諭宋國使士戌詔軍士自東京扈從至京師  
者復三年同知河間尹高昌福上書陳便宜上覽之再

三詔內外大小職官陳便宜丙寅詔左副元帥完顏古雲規措南邊及陝西等路事

二年正月戊辰朔日有食之伐鼓用幣上徹樂減膳不視朝庚午上謂宰相曰進賢退不肖宰相之職也有才能高于己者或懼其分權往往不肯引置同列朕甚不取卿等毋以此為心以前翰林學士承旨致仕翟永固為尚書左丞濟南尹布薩忠義為右丞都統色克副統完顏布呼坐擅易置中都官吏色克除名布呼削兩階

罷之辛未御太和殿宴百官宗戚命婦賜賚有差士申  
勅御史臺檢察六部文移稽而不行行而失當皆舉劾  
之甲戌除迎賽神佛禁令乙亥如大房山丙子獻享山  
陵禮畢欲獵而還左丞相晏等諫曰邊事未寧不宜遊  
幸戊寅還宮因諭晏等曰朕常慕古之帝王虚心受諫  
卿等有言即言毋緘默以自便辛巳以兵部尚書克實  
等謀反伏誅詔中外是日賜扈從明安穆昆甲士下至  
伊勒希有差遣左副點檢富察阿布哈等賞賚河南將

士以前勸農使伊喇元宜為御史大夫詔前工部尚書  
蘇保衡太子少保高思廉振賜山東百姓粟帛無妻者  
具姓名以聞庚寅行納粟補官法遣右副元帥完顏默  
音率師討蕭幹罕壬辰上謂宰執曰朕即位未半年可  
行之事甚多近日全無敷奏朕深居九重正賴卿等贊  
襄各思所長以聞朕豈有倦怠癸巳太白晝見甲午上  
謂宰執曰卿等當參民間利害及時事之可否以時敷  
奏不可公餘輒從自便優游而已命河北山東陝西等

路征南步軍並放還家咸平濟州軍三萬人屯京師丙申以西南路招討使完顏思敬兵部尚書阿林督北邊將士二月己亥前翰林待制大顙以言盜賊忤海陵杖而除名起為秘書丞補闕馬欽以謫事海陵得幸除名庚子詔前戶部尚書梁球戶部郎中耶律道安撫山東百姓招諭盜賊或避賊及避徭役在他所者並令歸業及時農種無問罪名輕重並與原免壬寅太傅尚書令張浩來見癸卯以初即位遣遼陽主簿舒穆魯伊德東



京麴院都監伊喇格布招契丹叛人為白彥敬赫舍哩  
志寧所害並贈鎮國上將軍令其家各食五品俸仍收  
錄其子甲辰以張浩為太師尚書令如故御史大夫伊  
喇元宜為平章政事辛亥定世襲明安穆昆遷授格子  
子以太保左領軍大都督瓚都為都元帥太保如故癸  
丑詔降蕭玉敬嗣暉許霖等官放歸田里甲寅復用進  
士為尚書省令史丙辰嵩州刺史舒穆魯珠德勒敗宋  
兵于壽安縣丁巳鄭州防禦使富察世傑取陝州甲子

詔都元帥瑄都開府山東經畧邊事澤州刺史特默格  
及其妻高福娘伏誅閏月甲戌上謂宰臣曰比聞外議  
言奏事甚難朕于可行者未嘗不從自今敷奏勿有所  
隱朕固樂聞之戊子謂宰臣曰臣民上書者多敕尚  
書省詳閱而不即具奏天下將謂朕徒受其言而不行  
也其亟條具以聞庚寅詔平章政事伊喇元宜泰州路  
規措邊事辛卯太和厚德殿火乙未尚書兵部侍郎溫  
都珠德勒等與斡罕戰敗于勝州三月癸卯參知政事

通吉義罷元帥左都監圖克坦喀齊喀敗宋師于德順  
州甲辰追削李通官職乙巳免南京正隆丁夫貸役錢  
辛亥以廉平誠諭中外官吏癸亥詔河南陝西山東昨  
因捕賊良民被虜為賊者釐正之四月己巳右副元帥  
完顏默音等敗韓罕于長漂辛未降廢帝亮為海陵郡  
王乙亥詔減御膳及宮中食物之半夏國遣使來賀即  
位及進方物及賀萬春節右副元帥完顏默音復敗韓  
罕于霽霖河辛巳宴夏使貞元殿故事外國使三節人

從皆坐廡下賜食上察其食不精腆曰何以服遠人之  
心掌食官皆杖六十癸未夏使朝辭乞互市從之己丑  
以左丞相晏為太尉壬辰詔征契丹部將士曰應契丹  
與大軍未戰而降者不得殺傷仍安撫之後詔誘來降  
者除奴婢以已虜為定其親屬使各還其家仍官為贖  
之五月丁酉朔以哈斯罕節度使白彥敬為御史大夫  
戊戌遣元帥左監軍高忠建會北征將帥討契丹己亥  
以臨海節度使赫舍哩志寧為元帥右監軍右副元

帥完顏默音元帥右監軍完顏福壽坐逗遛召還京師  
皆罷之壬寅立楚王允迪為皇太子詔中外丁巳押軍  
萬戶費摩阿拉明安伊喇薩爾拉敗宋兵于華州六月  
戊辰命御史大夫白彥敬西北路市馬庚午以尚書右  
丞布薩忠義為平章政事魚右副元帥經畧契丹詔出  
內府金銀給征契丹軍用戊寅詔居庸闕古北口譏察  
契丹姦細捕獲者加官賞已卯詔守禦古北口及石門  
闕庚辰宋遣使賀即位壬午右副元帥布薩忠義與幹

罕戰于和托戊子以南京留守赫舍哩良弼為尚書右丞右副元帥庚寅布薩忠義大敗幹罕于諾爾嶺西陷泉獲其弟諾爾壬辰以西南路招討使完顏思敬為元帥右都監七月丁酉復取原州丙午宋主傳位于子昀甲寅詔諭契丹丁巳率賓軍士珠勒呼等誣完顏默音子色克寄書其父謀反以其書上之上覽書曰此誣也止訊告者訊之果誣也珠勒呼伏誅庚申太尉尚書左丞相晏致仕壬戌詔發濟州會寧府軍在京師者以五千

人赴北京都統府陝西都統璋敗宋將吳璘于張義堡  
八月乙丑朔奚實默伯穆昆實呼等降左監軍高忠建破  
奚于栲栳山及招降旁近奚六營有不降者攻破之盡  
殺其男子以其婦女童孺分給諸軍丁卯永興縣進嘉  
禾士申萬戶溫特赫阿魯岱與奚戰于古北口敗焉詔  
同判大宗正事完顏默音等禦之癸酉上謂宰臣曰百  
姓上書陳時政其言猶有所補卿等位居機要略無獻  
替可乎夫聽斷獄訟簿書期會何人不能唐虞之聖猶

務兼覽博照乃能成治正隆專任獨見故取敗亡朕早  
夜孜孜冀聞讜論卿等宜體朕意詔百司官吏凡上書  
言事或為有司所抑許進表以聞朕將親覽以觀人材  
優劣夏國遣使賀尊號丁丑免齊國妃韓王亨樞密呼  
圖留守蹟等家親屬在宮籍者詔元帥右都監完顏思  
敬以所部軍與大軍會討斡罕乙酉詔左諫議大夫石  
琚監察御史馮仲尹廉察河北東路丁亥詔御史臺曰  
卿等所劾惟諸局行移稽緩及緩于赴局者耳此細事



也自三公以下官僚善惡邪正當審察之若止理細務而畧其大者將治卿等罪矣契丹老和尚降辛卯罷諸闕征稅九月甲午朔完顏默音擒奚明安和卓元帥右都監圖克坦喀齊喀敗宋吳璘于德順州乙未詔尚書右丞赫舍哩良弼以便宜招撫奚契丹之叛者庚子元帥右都監完顏思敬獲丹幹罕餘衆悉平以尚書左司員外郎完顏正臣為夏國生日使壬寅獵于近郊乙巳以伊喇幹罕平詔中外庚戌改葬睿宗皇帝壬子以

元帥右都監完顏思敬為右副元帥戊午詔思敬經畧  
南邊辛酉奉遷睿宗皇帝梓宮于磐寧宮癸亥元帥右  
監軍圖克坦喀齊喀敗宋兵德順州河南統軍使宗尹  
復取汝州十月丁卯以左副元帥完顏古雲為平章政  
事戊辰如山陵謁睿宗皇帝梓宮哭盡哀平章政事右  
副元帥布薩忠義等還自軍上謁丙戌以布薩忠義為  
尚書右丞相元帥左監軍赫舍哩志寧為左副元帥戊  
子葬睿宗皇帝于景陵大赦己丑詔左副元帥赫舍哩

志寧經略南邊壬辰華州防禦使富察世傑丹州刺史  
持嘉烏蘇埒克敗宋兵于德順州十一月癸巳朔詔右  
丞相布薩忠義伐宋丁酉第職官廉能汙濫不職各為  
三等而黜陟之十二月乙酉遣尚書刑部侍郎劉仲淵  
等廉察宣諭東京北京等路

三年正月壬辰朔高麗夏遣使來賀庚子太白晝見壬  
子遣客省使烏居仁賞勞河南軍士癸丑復取德順州  
二月甲子詔太子少詹事楊伯雄等廉問山西路庚午

上謂宰相曰灤州飢民流散逐食甚可矜恤移于山西富民贍濟仍于道路計口給食壬申詔撫諭陝西庚辰太保都元帥瑣都魯丙戌趙景元等以亂言伏誅庚寅高麗夏遣使來賀萬春節高麗遣使賀即位東京僧法通以妖術亂衆都統府討平之三月丙申中都以南八路蝗詔尚書省遣官捕之壬寅詔戶部侍郎魏子平等九人分詣諸路明安穆昆勸農及廉問詔臨潢漢民逐食于會寧府濟信等州庚戌詔免去年租稅四月辛酉

朔右副元帥完顏思敬罷丁卯平章政事完顏古雲  
御史大夫白彥敬罷以參知政事李石為御史大夫丁丑  
詔吏犯賊罪雖會赦不叙己卯以引進使韓綱為橫賜  
高麗使乙酉賑山西路明安穆昆貧民給六十日糧是  
月取商號環州宋所侵一十六州至是皆復五月辛卯  
朔右丞相布薩忠義朝京師乙未以重五幸廣樂園射  
柳命皇太子親王百官皆射勝者賜物有差上復御常  
武殿賜宴擊毬自是歲以為常丙申宋人攻破靈壁虹

縣已亥罷河南山東陝西統軍司置都統副統以太子詹事完顏守道從皇太子上召諭守道曰卿任執政所責非輕自今毋從行辛丑以右丞相布薩忠義兼都元帥癸卯布薩忠義還軍河南路都統奚托卜嘉叛入于宋丙午宋人攻破宿州辛亥更定出征軍逃亡法尚書省請籍天德間被誅大臣諸奴隸及從幹罕亂者為軍上以四方甫定民意稍蘇而復發軍非長策不聽癸丑詔諭契丹餘黨富色克等如能自新並釋其罪若執富

色克父子以來者仍官賞之左副元帥赫舍哩志寧復  
取宿州河南副統富珠哩定方死于陣乙卯以北京留  
守完顏思敬復為右副元帥中都蝗詔參知政事完顏  
守道按問大興府捕蝗官六月庚申朔日有食之以刑  
部尚書蘇保衡為參知政事丙子詔曰正隆之末濟州  
路逃回軍士為中都官軍所邀殺者官為收葬己卯觀  
稼于近郊甲申太師尚書令張浩罷以宿直將軍珠勒  
根呼雅克為橫賜夏國使七月庚戌太白晝見以太子

太師宗憲為平章政事以孔總襲封衍聖公八月丙寅  
太白經天庚午詔曰祖宗時有勞効未曾遷賞者五品  
以上奏聞六品以下及無職事者尚書省約量升除甲  
戌詔參知政事完顏守道招撫契丹餘黨戊寅詔罷契  
丹明安穆昆其戶分隸女直明安穆昆命諸官員年老  
者許存馬一二匹餘並括買入官勅殿前都點檢唐古  
德溫重九出獵國朝舊俗今扈從軍二十能無擾民可  
嚴為約束仍以錢萬貫分賜之乙酉如大房山丁亥薦



享于睿陵戊子還宮癸巳宿直將軍布薩實訥埒為夏  
國生日使九月丁酉秋獵以重九拜天于北郊丙午詔  
翰林待制劉仲誨等廉問車駕所經州縣乙卯還宮十  
月甲子大享于太廟丙寅以許王府長史伊喇塔富拉  
為高麗生日使癸酉冬獵十一月庚寅太白晝見經天  
壬辰還都戊申詔求仕官輒入權要之門迨一官仍降  
除以請求有所饋獻及受之者具狀奏裁庚戌百官請  
上尊號不允詔中都平州及饑荒地并經契丹剽掠有

質賣妻子者官為收贖壬子尚書左丞翟永固罷癸丑  
罷貢金線段匹甲寅以尚書右丞赫舍哩良弼為左丞  
吏部尚書石琚為參知政事十二月丁丑臘獵于近郊  
以所獲薦山陵自是歲以為常詔流民未復業增限招  
誘已卯參知政事蘇保衡至自軍辛巳以為尚書右丞  
四年正月丁亥朔高麗夏遣使來賀戊子罷路府州元  
日及萬春節貢獻上謂侍臣曰秦王宗翰有功于國何  
乃無嗣皆未知所對上曰朕嘗聞宗翰在西京坑殺句

者十人得非其報耶癸巳百官復請上尊號不允丁酉  
如安州春水壬寅至安州大雪詔扈從人舍民家者人  
日支錢一百與其主甲辰元帥府言宋遣審議官胡昉  
致尚書右僕射書來議和好以其言失信拘昉軍中以  
書答之及以書進上覽之曰宋人失信行人何罪常即  
遣還邊事令元帥府從宜措畫乙巳尚書省奏徐州民  
曹珪討賊江志而子弼亦在賊中并殺之法當補二官  
敘雜班上以所奏未當進一官正班用之辛亥獲頭鵝

遣使薦山陵自是歲以為常二月丁巳免安州今年賦役及保塞縣御城邊吳二村凡扈從人嘗止其家者亦復一年辛酉獵于高陽之北庚午還都庚辰以北京粟價踴貴詔免今年課甲三月丙戌朔萬春節高麗夏遣使來賀詔免北京歲課段匹一年庚子京師地震壬寅百官復請上尊號不允四月丁巳平章政事完顏元宜罷甲戌出宮女二十一人五月旱癸卯敕有司審冤獄禁宮中音樂放毬場役夫乙巳詔禮部尚書王競禱雨

於北岳己酉命參知政事石琚等于北郊望祭禱雨士  
子雨幹罕餘黨當色克伏誅六月甲寅朔日有食之士  
戌尚書左丞赫舍哩良弼至自征南元帥府甲子以雨  
足命有司祭謝嶽鎮海瀆于北郊己巳幸東宮視皇太  
子疾庚午初定祭五嶽四瀆禮辛未觀稼于近郊庚辰  
詔諭元帥府曰所請伐宋軍萬五千今以騎三千步四  
千赴之詔陝西元帥府議入蜀利害以聞七月壬辰故  
衛王襄妃及其子和尚以妖妄伏誅庚子以尚書左丞

赫舍哩良弼為平章政事辛丑大風雷雨拔木八月甲寅朔詔征南元帥府曰前所請收復舊疆乞候秋涼進發今已秋涼復俟何時戊午以參知政事完顏守道為尚書左丞大興尹唐古安禮為參知政事壬申上謂宰臣曰卿每奏皆常事凡治國安民及朝政不便于民者未嘗及也如此則宰相之任誰不能之己卯如大房山辛巳致祭于山陵九月癸未朔還都乙酉上謂宰臣曰形勢之家親識訴訟請屬道達官吏往往屈法徇情宜

一切禁止己丑上謂宰臣曰北京懿州臨潢等路嘗經契丹寇掠平薊二州近復蝗旱百姓艱食父母兄弟不能相保多冒鬻為奴朕甚憫之可速遣使閱實其數出內庫物贖之乙未幸鷹房主者以鷹隼置內省堂上上怒曰此宰相廳事豈置鷹隼處耶痛責其人俾置他所己亥以宿直將軍烏哩雅為夏國生日使辛亥以太子少詹事烏庫哩薩哈為高麗生日使十月癸亥朔獵于密雲縣丙寅還都己卯命泰寧軍節度使張弘信等二

十四人分路通檢諸路物力十一月乙酉征南都統圖克  
坦克寧敗宋兵取楚州己丑封子永功為鄭王辛卯冬  
獵乙未詔進師伐宋戊戌次河間府辛丑尚書省火甲  
辰次清州閏月壬子朔還都十二月丁亥尚書省奏都  
統高景山取商州己丑臘獵于近郊辛卯太白晝見經  
天是歲大有年斷死罪十有七人

五年正月辛亥朔高麗夏遣使來賀乙卯詔泰州臨潢  
接境設邊堡七十駐兵萬三千己未宋通問使魏杞等



以國書來書不稱大稱姪宋皇帝稱名再拜奉書于叔  
大金皇帝歲幣二十萬辛未詔中外復命有司旱蝗水  
溢之處與免租賦癸酉命元帥府諸新舊軍以六萬人  
留戍餘並放還以宋國歲幣悉賞諸軍二月壬午以左  
副都點檢完顏仲等為宋報問使壬寅罷納粟補官令  
三月戊申萬春節宋高麗夏遣使來賀壬申羣臣奉上  
尊號曰應天興祚仁德聖孝皇帝詔中外四月癸卯西  
京留守壽王京謀反獄成特免死杖之除名嵐州安置

乙巳右副元帥完顏思敬罷丁未右丞相都元帥布薩  
忠義還自軍五月壬子左副元帥赫舍哩志寧以召入  
見丁巳以布薩忠義為尚書左丞相赫舍哩志寧為平  
章政事還軍乙丑以平章政事宗憲為尚書右丞相癸  
酉罷山東路都統府以其軍各隸總管府六月甲辰芝  
產大安殿柱丙午京師地震雨毛七月戊申朔京師地  
復震罷陝西都統府復置統軍司京兆徙陝西元帥府  
河中八月己卯前宿州防禦使烏凌阿薩喇以與宋李

世輔交通伏誅癸巳宋夏遣使賀尊號九月丁未朔以  
吏部尚書高衍等為賀宋生日使戊申秋獵庚戌以宿  
直將軍珠格芬徹為夏國生日使甲戌還都十月丁丑  
朔地震辛巳以太宗正丞璋為高麗生日使乙未冬獵  
辛丑還都十一月丙午朔上謂宰臣曰朕在位日淺未  
能徧識臣下賢否全賴卿等盡公舉薦今六品以下殊  
乏人材何以副朕求賢之意癸丑幸東宮戊午以右副  
都點檢烏庫哩尼瑪哈為賀宋正旦使癸亥立諸路通

檢地土等第稅法癸酉大霧晝晦十二月己丑獵于近郊高麗遣使賀尊號

六年正月丙午朔宋高麗夏遣使來賀庚午敕有司宮中張設毋以塗金為飾二月丁亥尚書左丞相兼都元帥沂國公布薩忠義薨三月壬寅萬春節宋高麗夏遣使來賀甲寅上如西京庚申次歸化州西京留守唐古德溫上謁戊辰至西京庚午朝謁太祖廟壬申擊毬百姓縱觀四月甲戌朔詔月朔禁屠宰戊戌以尚書右司

郎中伊喇道為橫賜高麗使宿直將軍錫默果囉為橫  
賜夏國使辛丑太白晝見五月戊申幸華嚴寺觀故遼  
諸帝銅像詔主僧謹視之壬子詔雲中大同縣及警巡  
院復給一年壬戌詔將幸銀山諸扈從軍士賜錢五萬  
貫有敢損苗稼者並償之六月辛丑太白晝見經天丙  
戌發自西京庚子獵于銀山七月辛酉次三义口八月  
辛未朔次涼陁庚辰獵于望雲之南山九月辛丑朔至  
自西京丁未以戶部尚書魏子平為賀宋生日使辛亥

以翰林待制伊喇熙載為夏國生日使澤州刺史劉德裕等以盜用官錢伏誅壬子太白晝見癸丑尚書右丞相宗憲薨丙辰太白晝見經天十月己卯以尚書兵部侍郎伊喇諳達為高麗生日使甲申朝享于太廟詔免雄莫等州今年租壬辰太白晝見經天丁酉如安肅州冬獵十一月丙午還都癸丑以右副都點檢烏庫哩元忠為賀宋正旦使上謂宰臣曰朝官當慎選其人庶可激勵其餘若不當則啓覬覦之心卿等必知人才優劣

舉實才用之庚申太白晝見經天丁卯參知政事石琚  
以母憂罷十二月甲戌詔有司每月朔望及上七日毋  
奏刑名戊子太白晝見經天甲午泰州民和卓謀反伏  
誅丙申以平章政事赫舍哩良弼為尚書右丞相赫舍  
哩志寧為樞密使

七年正月庚子朔宋高麗夏遣使來賀辛亥石琚起復  
參知政事壬子服袞冕御大安殿受尊號冊寶癸丑大  
赦庚申以元帥左監軍圖克坦喀齊喀為樞密副使二

月庚寅尚書右丞蘇保衡薨丙申以參知政事石琚為  
尚書右丞三月己亥朔萬春節宋高麗夏遣使來賀四  
月戊辰朔日有食之壬辰以御史大夫李石為司徒大  
夫如故五月丙午大興府獄空詔賜錢三百貫為宴樂  
之用以勞之甲寅以北京留守諾延溫都烏達為參知  
政事六月癸酉命地衣用龍文者罷之七月戊申禁服  
用金線其織賣者皆抵罪丙辰幸東宮己未幸東宮視  
皇太子疾閏月丁卯觀稼于近郊戊辰越王永中進封



許王鄭王永功封隋王永成封藩王甲戌詔遣秘書監  
伊喇子敬經畧北邊戊寅幸東宮己卯慶雲環日壬午  
觀稼于近郊戊子觀稼于北郊八月辛亥慶雲環日癸  
丑尚書右丞相監修國史赫舍哩良弼進太宗實錄上  
立受之己未如大房山壬戌致祭睿陵九月乙丑朔還  
宮己巳右三部檢法官韓贊以捕蝗受賂除名詔吏人  
但犯贓罪雖會赦非特旨不叙用以勸農使富察索囉  
等為賀宋生日使辛未參知政事唐古安禮罷乙亥以

宿直將軍唐古呼魯為夏國生日使庚辰地震辛巳以都水監李衛國為高麗生日使乙酉秋獵庚寅次保州詔修起居注王天祺察訪所經過州縣官十月乙未朔上謂侍臣曰近聞朕所幸郡邑曾宴寢堂宇後皆避之此甚無謂可宣諭令仍舊居止戊申還都丁巳上謂宰臣曰海陵不辨人才優劣惟徇己欲多所升擢朕即位以來以此為戒止取實才用之近聞蠡州同知伊喇延壽在官污濫詢其出身乃正隆時鷹房子如鷹房廚人

之類可與城牧民耶自今如此局分不得授以臨民職  
任以御史中丞孟浩為參知政事是日參知政事諾延  
溫都烏達薨辛酉勅有司于東宮涼樓前增建殿位孟  
浩諫曰皇太子雖為儲貳宜示以儉德不當與至尊宮  
室相侔乃罷之十一月乙丑朔上謂宰臣曰縣令多非  
其人令吏部察善惡明加黜陟辛未以河間尹圖克坦  
克寧等為賀宋正旦使壬申太白晝見丁丑歲星晝見  
丁亥樞密副使圖克坦喀齊喀罷十二月戊戌東京留

守圖克坦喀齊喀北京留守完顏默音肇州防禦使富察通朝辭賜通金帶諭曰卿雖有才用心多詐朕左右須忠實人故命卿補外賜卿金帶者答卿服勞之久也又顧謂左宣徽使敬嗣暉曰如卿不可謂無才所欠者純實耳甲辰以北京留守完顏思敬為平章政事是歲斷死囚二十人

八年正月甲子朔宋高麗夏遣使來賀乙丑上謂宰臣曰朕治天下方與卿等共之事有不可各當面陳以輔

朕之不逮慎毋阿順取容卿等致位公相正行道揚名之時苟或偷安自便雖為今日之幸後世以為何如羣臣皆稱萬歲辛未謂秘書監伊喇子敬等曰昔唐虞之時未有華飾漢惟孝文務為純儉朕于宮室惟恐過度其或興修即損宮人歲費以充之今亦不復營建矣如宴飲之事近惟太子生日及歲元嘗飲酒往者亦止上元中秋飲之亦未嘗至醉至于佛法尤所未信梁武帝為同泰寺奴遼道宗以民戶賜寺僧復加以三公之官

其惑深矣庚辰行皇太子冊禮二月甲午朔制子為改  
嫁母服喪三年上諭左宣徽使敬嗣暉曰凡為人臣上  
欲要君之恩下欲干民之譽必虧忠節卿宜戒之三月  
癸亥朔萬春節宋高麗夏遣使來賀己巳命以職官子  
補令史丁丑命護衛親軍百戶五十戶非直日不得帶  
刀入宮己丑太白晝見四月丙午詔曰馬者軍旅所用  
牛者農耕之資殺牛有禁馬亦何殊其令禁之戊申擊  
毬常武殿司馬馬貴中諫曰陛下為天下主繫社稷之

重又春秋高園獵擊毬危事也宜悉罷之上曰朕以示  
習武耳五月甲子北望淀大震風雨雹廣十里長六十  
里詔戶工兩部自今宮中之飾並勿用黃金乙丑上如  
涼陘丁卯歲星晝見庚寅改旺國崖曰靜寧山和爾和  
東川曰金蓮川六月河決李固渡水入曹州七月甲子  
制盜羣牧馬者死告者給錢三百貫戊辰上謂平章政  
事完顏思敬等曰朕思得賢士寤寐不忘自今朝臣出  
外即令體訪外任職官廉能者及草萊之士可以助治

者具姓名以聞甲戌秋獵已卯次三义口上諭點檢司  
曰沿路禾稼甚佳其扈從人少有蹂踐則當汝罪八月  
乙卯至自涼陁九月辛酉上諭尚書石丞石琚參政孟  
浩曰聞蔚州採地葦役夫數百千人朕所用幾何而擾  
動如此自今差役凡稱御前者皆須稟奏仍附冊癸亥  
以石宣徽使伊喇錫勒塔干等為賀宋生日使已巳以  
引進使高希甫為夏國生日使庚午上幸東宮癸酉上  
諭宰臣曰卿等舉用人材凡已所知識必使他人舉奏



朕甚不喜如其果賢何必以親疎為避忌也以戶部尚書魏子平為參知政事辛巳上謂御史大夫李石曰臺憲固在分別邪正然內外百司豈謂無人惟見卿等劾人之罪不聞舉善自今宜令監察御史分別刺舉善惡以聞上嘗命左衛將軍大磐訪求良弓而磐多自取護衛羅索以告上命點檢司鞠磐磐姝為寶林磐屬內侍僧兒言之寶林寶林以聞命杖僧兒百出磐為隴州防禦使十月己丑朔以戒諭官吏貪墨詔中外乙未命涿

州刺史兼提點山陵每以朔望致祭朔則用素望則用肉仍以明年正月為首及命圖畫功臣于太祖廟其未立碑者立之以翰林待制靖為高麗生日使上謂宰臣曰海陵時修起居注不任直臣故所書多不實可訪求得實詳而錄之參政孟浩進曰良史直筆君舉必書自古帝王不自觀史意正在此辛亥詔罷復州歲貢鹿筋十一月乙丑幸東宮以同簽大宗正事博克托等為賀宋正旦使十二月戊子朔遣武定軍節度使伊喇安等

招諭準布

九年正月戊午朔宋高麗夏遣使來賀辛酉上與宣徽使敬嗣暉秘書監伊喇子敬論古今事因曰亡遼日屠食羊三百亦豈能盡用徒傷生耳朕雖處至尊每當食常思貧民飢餒猶在己也彼身為惡而口祈福何益之有如海陵以張仲軻為諫議大夫何以得聞忠言朕與大臣論議一事非正不言卿等不以正對豈人臣之道也庚午詔諸州縣和糴毋得抑配百姓戊寅契丹愛實

拉等謀叛伏誅丙戌制漢人渤海兄弟之妻服闋歸宗  
以禮續婚者聽二月庚寅制妄言邊關兵馬者徒二年  
丙申詔改葬漢二燕王于城東庚子以中都等路水免  
稅詔中外又以曹單二州被水尤甚給復一年甲寅詔  
女真人與諸色人公事相關只就女直理問三月丁巳  
朔萬春節宋高麗夏遣使來賀丁卯以尚書省定網捕  
走獸法或至徒上曰以禽獸之故而抵民以徒是重禽  
獸而輕民命也豈朕意哉自今有犯可杖而釋之詔御

史中丞伊喇道廉問山東河南辛未禁民間稱言銷金條理內舊有者改作明金字辛巳以大名路諸明安民戶艱食遣使發倉廩減價出之四月己丑謂宰臣曰朕觀在位之臣初入仕時競求聲譽以取爵位亦既顯達即徇默苟容為自安計朕甚不取宜宣諭百官使知朕意癸巳遣翰林修撰富察烏琿監察御史完顏和碩分詣河北西路大名河南山東等路勸明安穆昆農五月丙辰朔符寶郎圖克坦懷貞為橫賜高麗使宿直將軍

完顏賽音為橫賜夏國使戊辰尚書省奏越王永中隋  
王永功二府有所興造發役夫上曰朕見宮中竹有枯  
瘁者欲令更植恐勞人而止二王府各有引從人力又  
奴婢甚多何得更役百姓爾等但以例為請海陵橫役  
無度可盡為例耶自今在都浮役久為例者仍舊餘並  
官給傭直重者奏聞六月庚寅冀州張和等反伏誅戊  
戌以久旱命宮中毋用扇庚子雨七月乙卯朔罷東北  
路採珠壬申觀稼于近郊八月甲申朔有司奏日食以

雨不見伐鼓用幣如常禮九月甲寅朔以刑部尚書高德基等為賀宋生日使宿直將軍布薩守中為夏國生日使提點司天臺馬貴中為高麗生日使罷皇太子月料歲給錢五萬貫上謂臺臣曰比聞朝官內有攬中官物以規貨利者汝何不言皆對曰不知上曰朕尚知之汝有不知者乎朕若舉行汝將安用壬戌秋獵十月丁亥還都辛丑以尚書右丞相赫舍哩良弼為左丞相樞密使赫舍哩志寧為右丞相詔宗廟之祭以鹿代牛著

為令丙午大享于太廟辛亥以平章政事完顏思敬為  
樞密使十一月己未以尚書右丞完顏守道為平章政  
事右丞石琚為左丞參知政事孟浩為右丞庚申上幸  
東宮辛酉以京兆尹毅等為賀宋正旦使壬戌冬獵丙  
子還都十二月丙戌詔賑臨潢泰州山東東路河北東  
路諸明安民東京留守圖克坦喀齊喀為平章政事丁  
酉太白晝見辛丑獵近郊丙午制職官犯公罪在官已  
承伏者雖去官猶論



十年正月士子朔宋高麗夏遣使來賀甲子命宮中元  
宵無得張燈甲戌以司徒御史大夫李石為太尉尚書  
令二月甲午安化軍節度使圖克坦子溫副使老君努  
以賊罪誅戊申上謂近臣曰護衛以後皆是治民之官  
其令教以讀書三月士子朔萬春節宋高麗夏遣使來  
賀丙辰上因命護衛中善射者押賜宋使射弓宴宋使  
中五十押宴者纔中其七謂左右將軍曰護衛十年出  
為五品職官每三日上直役亦輕矣豈徒令飽食安卧

而已弓矢不習將焉用之戊午以河南統軍使宗敘為  
參知政事庚午上謂參政宗敘曰卿昨為河南統軍時  
言黃河堤埽利害甚合朕意朕每念百姓差調官吏互  
為姦弊不早計料臨期星火率斂所費倍蓰為害非細  
卿既參朝政皆當革弊擇利行之又諭左丞石琚曰女  
直人徑居達要不知閭閻疾苦汝等自丞簿至是民間  
何事不知凡有利害宜悉敷陳四月丁酉制命婦犯姦  
不用夫廕以子封者不拘此法五月乙卯如柳河川閨

月庚辰夏國任得敬脅其主李仁孝使上表請中分其國上問宰臣李石石等以為事繫彼國不如許之上曰彼劫于權臣耳詔不許并却其貢物七月壬午秋獵戊戌放圍場役夫詔扈從糧食並從官給乙卯勅扈從人縱畜牧蹂踐禾稼者杖之仍償其值八月己未至自柳河川壬申遣參知政事宗敘北巡九月庚辰尚書左丞相赫舍哩良弼丁憂起復如故壬午以簽書樞密院事伊喇子敬為賀宋生日使庚寅戶部郎中瓜爾佳阿里

布為夏國生日使十月己酉以大宗正丞堅為高麗生  
日使甲寅如霸州冬獵乙丑上謂大臣曰比因巡獵聞  
固安縣令高昌裔不職已令罷之霸州司候成奉先奉  
職謹恪可進一階除固安令辛未上謂宰臣曰朕凡論  
事有未能深究其利害者卿等宜悉心論列無為面從  
而退有後言十一月辛巳制盜太廟物者與盜宮中物  
同論甲申上幸東宮丁亥以太子詹事富察富色克等  
為賀宋正旦使癸巳夏國以誅任得敬遣使來謝詔慰

諭之十二月丙寅上謂宰臣曰比體中不佳有妨朝事  
今觀所奏事皆依條格殊無一利國之事若一朝行一  
事歲計有餘則其利溥矣朕居深宮豈能悉知外事卿  
等尤當注意

十一年正月丙子朔宋夏遣使來賀丁丑封子永升為  
徐王永蹈為滕王永濟為薛王壬午詔職官年七十以  
上致仕者不拘官品並給俸祿之半丙申命賑南京屯  
田明安被水災者戊戌尚書省奏汾陽軍節度使副牛

信昌生日受饋獻法當奪官上曰朝廷行事苟不自正何以正天下尚書省樞密院生日節辰饋獻不火此而不問小官饋獻即加按劾豈正天下之道自今宰執樞密饋獻亦宜罷去上謂宰臣曰往歲清暑山西近路禾稼甚廣殆無畜牧之地因命五里外乃得耕墾今聞民皆去之他所甚可矜憫其命依舊耕種事有類此卿等宜即告朕三月己亥朔萬春節宋夏遣使來賀辛巳命有司以天水郡公旅觀依一品禮葬于鞏洛之原四月

丁未歸德府民臧安兒謀反伏誅大理卿李昌圖以廉  
問真定尹圖克坦貞咸平尹舒穆魯阿瑪拉受賊事既  
得實不即黜罷杖之四十癸亥參知政事魏子平罷高  
麗國王暉弟皓廢其主自立詐稱讓國遣使以表來上  
五月辛卯詔遣吏部侍郎靖使高麗問故癸巳以南京  
留守伊喇成為樞密副使六月己酉詔曰諸路常貢數  
內同州沙苑羊非急用徒勞民爾自今罷之朕居深宮  
勞民之事豈能盡知當具以聞戊午觀稼于近郊甲子

平章政事圖克坦喀齊喀薨七月甲申參知政事宗敘薨八月癸卯朔太白晝見詔朝臣曰朕嘗諭汝等國家利便治體遺闕皆可直言外路官民亦嘗言事汝等終無一語凡政事所行豈能皆當自今直言得失毋有所隱乙巳上謂宰臣曰隨朝之官自謂厯一考則當得某職兩考則當得某職第務因循碌碌而已自今以外路官與內除者察其公勤則升用之但苟簡于事不須任滿便以本品出之賞罰不明豈能勸勉庚戌詔曰應因



幹罕被掠女直及諸色人未經刷放者官為贖放隱匿者以違制論其年幼不能稱說住貫者從便住坐上謂宰臣曰五品以下闕員甚多而難于得人三品以上朕則知之五品以下不能知也卿等曾無一言見舉者欲畫久安之計興百姓之利而無良輔佐所行皆尋常事耳雖日日視朝何益之有卿等宜勉思之已巳以尚書刑部侍郎烏凌阿天錫等為賀宋生日使近侍局使劉琬為夏國生日使九月癸未獵于橫山庚寅還都十月

壬寅朔以左宣徽使敬嗣暉為參知政事甲寅上謂宰  
臣曰朕已行之事卿等以為成命不可復更但承順而  
已一無執奏且卿等凡有奏何嘗不從自今朕旨雖出  
宜審而行有未便者即奏改之或在下位有言尚書省  
所行未便亦當從而改之毋拒而不從丙寅尚書左丞  
相赫舍哩良弼進睿宗實錄戊辰上謂宰臣曰衍慶宮  
圖畫功臣已命增為二十人如丞相韓企先自本朝興  
國以來憲章法度多出其手至于闕決大政但與大臣

謀議終不使外人知覺漢人宰相前後無比若褒顯之亦足示勸慎無遺之十一月丁丑以西南路招討使宗寧等為賀宋正旦使戊寅幸東宮上謂皇太子曰吾兒在儲貳之位朕為汝措天下當無復有經營之事汝惟無忘祖宗純厚之風以勤修道德為孝明信賞罰為治而已昔唐太宗謂其子高宗曰吾伐高麗不克終汝可繼之如此之事朕不以遺汝如遼之海濱王以國人愛其子嫉而殺之此何理也子為衆愛愈為美事所為若

此安有不亡唐太宗有道之君而謂其子高宗曰爾于  
李勣無恩今以事出之我死宜即授以僕射彼必致死  
力矣君人者焉用偽為受恩于父安有忘報于子者乎  
朕御臣下惟以誠實耳羣臣皆稱萬歲丙戌朝享于太  
廟丁亥有事于圓丘大赦癸巳羣臣奉上尊號曰應天  
興祚欽文廣武仁德聖孝皇帝乙未詔中外十二月癸  
卯冬獵乙卯還宮丙辰參知政事敬嗣暉薨辛酉進封  
越王永中趙王隋王永功曹王瀋王永成幽王徐王永

升虞王滕王永蹈徐王薛王永濟滕王乙丑趙王永中  
曹王永功俱授明安仍命永功親治事以習為政

金史卷六

欽定四庫全書

金史卷七

元中書右丞相總裁托克托等修

本紀第七

世宗中

十二年正月庚午朔宋高麗夏遣使來賀戊午詔有司  
凡陳言文字皆國政利害自今言有可行以其本封送  
秘書監當行者錄副付所司丙申以水旱免中都西京

南京河北河東山西陝西去年租稅二月壬寅上召諸王府長史諭之曰朕選汝等正欲勸導諸王使之為善如諸王所為有所未善當力陳之尚或不從則具某日行某事以奏若阿意不言朕惟汝罪丙午尚書省奏廉察到同知城陽軍事山和尚等清强官上曰此輩暗察明訪皆著政聲可第其政績各進官旌賞其速議升除庚午上如順州春水癸丑還都丙辰詔自今官長不法其僚佐不能糾正又不言上者竝坐之戶部尚書高德



基濫支朝官俸錢四十萬貫杖八十三月己巳朔萬春  
節宋高麗夏遣使來賀乙亥詔尚書省贓汙之官已被  
廉問若仍舊職必復害民其遣使諸道即日罷之丁丑  
詔遣宿直將軍烏庫哩色埒冊封王皓為高麗國王庚  
寅雨土癸巳以前西北路詔來討使伊喇道為參知政事  
回紇遣使來貢丁酉北京曹貴等謀反伏誅四月旱癸  
卯尚書右丞孟浩罷丁巳西北路納哈塔齊勤等謀反  
伏誅癸亥以久旱禱祠山川詔宰臣曰諸府少尹多闕

員當選進士雖資叙未至而有政聲者擢用之以宿直將軍唐古阿古爾為橫賜夏國使乙丑大名尹荆王文以贓罪奪王爵降授德州防禦使回紇使使來貢丙寅尚書右丞相赫舍哩志寧薨丁卯宋高麗遣使賀尊號準布來貢五月癸酉上如百花川甲戌命賑山東東路知倫明安民飢丁丑次珠卜奇久旱而雨戊寅觀稼禁扈從蹂踐民田禁百官及承應人不得服純黃油衣癸未諭宰臣曰朕每次舍凡秣馬之具皆假于民間多亡

失不還其主此彈壓官不職可擇人代之所過即令詢  
問亡失民間物竝償其直乙酉詔給西北路人戶牛六  
月甲寅如金蓮川九月丙子至自金蓮川辛巳以右副  
都點檢爪爾佳清臣等為賀宋生日使右衛將軍鈕祜  
祿鳴達爾為夏國生日使丁亥太白晝見在日前鄜州  
李方等謀反伏誅十月高麗國王王皓遣使謝封冊乙  
未臨奠故右丞相赫舍哩志寧喪志寧妻永安縣主進  
鎧甲弓矢鷹鵠重綵壬子詔皇太子及趙王永中上殿

上顧謂宰臣曰京嘗圖逆今不除之恐為後患又曰天下大器歸于有德海陵失道朕乃得之但務修德餘何足慮皇太子及永中皆曰誠如聖訓遂釋之內辰以德州防禦使文質產賜其兄之子耀珠且諭其母文之罪汝等皆當連坐念宋王有大功于國故置不問仍以家產賜汝子十一月甲戌上謂宰臣曰宗室中有不任官事者若不加恩澤于親親之道有所未弘朕欲授以散官量予廩祿未知前代何如左丞石琚曰陶唐之親九

族周家之內睦九族見于詩書皆帝王美事也丙子上  
以曹國公主家奴犯事宛平令劉彥弼杖之主乃折辱  
令既深責公主又以臺臣徇勢偷安畏忌不敢言奪俸  
一月以陝西統軍使璋為御史大夫以戶部尚書曹望  
之為賀宋正旦使壬午同州民屈立等謀反伏誅戊子  
上屏侍臣與宰臣議事記注官亦退上曰史官記人君  
善惡朕之言動及與卿等所議皆當與知其于記錄無  
或有隱可以朕意諭之十二月乙未朔以濟南尹劉蕡

在定武軍貪墨不道命大理少師張九思鞠之丁酉詔遣使及護衛二十人分路選年二十以上四十以下有門地才行及善射者充護衛不得過百人冀州王瓊等謀反伏誅德州防禦使文以謀反伏誅辛丑出宮女二十餘人已酉樞密副使伊喇成罷辛亥禁審錄官以宴飲廢公務詔金銀坑冶聽民開採毋得收稅辛丑獵于近郊以殿前都點檢圖克坦克寧為樞密副使己未詔自今除名人子孫有在仕者竝取奏裁

十三年正月己丑朔宋高麗夏遣使來賀癸酉尚書省  
奏南客車俊等因權場貿易誤犯邊界罪當死上曰本  
非故意可免罪發還母令彼國知之恐復治其罪詔有  
司嚴禁州縣坊里為民害者閏月壬辰詔太子詹事曰  
東宮官屬尤當選用正人如行檢不修及不稱職者其  
以名聞辛酉太白晝見洛陽縣賊聚衆攻盧氏縣殺縣  
令李庭才亡入于宋三月癸巳朔萬春節宋高麗夏遣  
使來賀乙卯上謂宰臣曰會寧乃國家興王之地自海

陵遷都永安女直人寢忘舊風朕時嘗見女直風俗迄  
今不忘今之燕飲音樂皆習漢風蓋以備禮也非朕心  
所好東宮不知女直風俗第以朕故猶尚存之恐異時  
一變此風非長久之計甚欲以至會寧使子孫得見舊  
俗庶幾習效之太子詹事劉仲誨請增東宮牧人及張  
設上曰東宮諸司局人自有常數張設已具尚何增益  
太子生于富貴易入于侈惟當導以淳儉朕自即位以  
來服御器物徃徃仍舊卿以此意諭之四月己巳定出



繼子所繼財產不及本家者以所繼與本家財產通數均分制以有司言特授洺州孝子劉政太子掌飲丞乙亥上御睿思殿命歌者歌女直詞顧謂皇太子及諸王曰朕思九朝所行之事未嘗暫忘故時聽此詞亦欲令汝輩知之汝輩自幼惟習漢人風俗不知女直純實之風至于文字語言或不通曉是忘本也汝輩當體朕意至于子孫亦當遵朕教誡也辛巳更定益宗廟祭物法五月壬辰朔日有食之戊戌禁女直人毋得譯為漢姓

壬寅真定尹孟浩薨甲辰尚書省奏鄧州民范三毆殺人當死而親老無侍上曰在醜不爭謂之孝孝然後能養斯人以一朝之忽忘其身而有事親之心乎可論如法其親官與養濟六月樞密使完顏思敬薨七月庚子復以會寧府為上京庚戌罷歲課雉尾八月丁卯以判大興尹趙王永中為樞密使詔賜諸明安穆昆廉能三等官賞已卯御史大夫璋罷丙戌以左副都點檢襄等為賀宋生日使丁亥秋臘九月辛卯朔以宿直將軍和

索哩為夏國生日使辛亥還都大名府僧李智究等謀  
反伏誅十月乙丑歲星晝見丙子以前南京留守唐古  
安禮為尚書右丞十一月以大興尹璋為賀宋正旦使  
引進使德敦為高麗生日使上謂宰臣曰外路正五品  
職事多闕員何也太尉李石對曰資考少有及者上曰  
苟有賢能當不次用之壬子吏部尚書梁肅請禁奴婢  
服羅綺上曰近已禁其服明金行之以漸可也且教化  
之行當自貴近始朕宮中服御常自節約舊服明金者

已減大半矣近民間風俗比正隆時聞稍淳儉卿等當更務從儉素使民知所效也

十四年正月己丑朔宋高麗夏遣使來賀二月壬戌以大興尹璋使宋有罪杖百五十除名仍以所受禮物入官丙寅以刑部尚書梁肅等為宋詳問使庚午以太尉尚書令李石為太保致仕戊寅詔免去年被水旱百姓租稅三月戊子朔萬春節宋高麗夏遣使來賀甲午上謂大臣曰海陵純尚吏事當時宰執止以案牘為功卿

等當思經濟之術不可狃于故常也又詔明安穆昆之  
民今後不許殺生祈祭若遇節辰及祭天日許得飲會  
自二月一日至八月終並禁絕飲燕亦不許赴會他所  
恐妨農功雖閒月亦不許痛飲犯者抵罪可徧諭之又  
命應衛士有不閑女直語者竝勒習學仍自後不得漢  
語辛丑太白歲星晝見甲辰上更名雍詔中外丙辰太  
白歲星晝見經天四月乙丑上諭宰臣曰聞愚民祈福  
多建佛寺雖已條禁尚未犯者宜申約束無令徒費財

用戊辰有事于太廟以皇太子攝行事乙亥以勸農副使完顏佛寧為橫賜高麗使上御垂拱殿顧謂皇太子及親王曰人之行莫大于孝弟孝弟無不蒙天日之祐汝等宜盡孝于父母友于兄弟自古兄弟之際多因妻妾離間以至相違且妻者乃外屬耳可比兄弟之親乎若妻言是聽兄弟相違甚非理也汝等當以朕言常銘于心戊子以樞密副使圖克坦克寧兼大興尹五月丙戌朔詳問使梁肅等還自宋甲午如金蓮川六月己未

太白晝見八月丁巳次珠爾蘇日中白龍見御帳東小  
港中須臾乘雲雷而去癸亥獵于瑪哩布己卯太白晝  
見九月丁亥還都乙未以兵部尚書完顏讓等為賀宋  
生日使宿直將軍崇肅為夏國生日使癸卯上退朝謂  
侍臣曰朕自在潛邸及踐阼以至于今於親屬舊知未  
嘗欺心有徇近御史臺奏樞密使永中嘗致書河南統  
軍使完顏仲託以賣馬朕知而不問朕之欺心此一事  
耳夙夜思之甚如有疾已酉宋遣使報聘十月乙卯朔

詔圖畫功臣二十人衍慶宮聖武殿之左右廡十一月  
甲申朔日有食之丙申御史中丞劉仲誨等為賀宋正  
旦使戊戌召尚食局使諭之曰大官之食皆民脂膏日  
者品味太多不可徧舉徒為虛費自今止進可口者數  
品而已戊申以儀鸞局使曹士元為高麗國生日使十  
二月戊寅以平章政事完顏守道為右丞相樞密副使  
圖克坦克寧為平章政事

十五年正月

此下闕

七月丙午展盤與其所部喀喇貝



歡等內附九月戊子至自金蓮川辛卯高麗西京留守  
趙位寵叛其君請以慈悲嶺以西鴨綠江以東四十餘  
城內附不納丙申幸新宮閏月己酉朔定應禁弓箭鎗  
刀路分品官家奴客旅等許帶弓箭制上謂左丞相良  
弼曰今之在官者須職位稱慊所望然後始加勉力其  
或稍不如意則止以度日為務是豈忠臣之道耶丁巳  
又謂良弼曰武靈時領省東德左丞相言皆有能名然  
為政不務遠圖止以苛刻為事言及克實等在會寧時

一月之間杖而殺之者二十人罪皆不至於死於理可  
乎海陵為人如虎此輩尚欲以術數要之以至賣直取  
死得為能乎己未以歸德尹完顏王祥等為賀宋生日  
使符寶郎錫默和尚為夏國生日使辛酉高麗國王奏  
告趙位寵伏誅詔慰答之詔親王百官僚人所服紅紫  
改為黑紫甲戌詔年老之人毋注縣令今年老而任從政  
其佐亦擇壯者參用十月乙未冬獵丁未還都十一月  
乙卯上幸東宮初唐古部族節度使伊喇摩多之子殺

其妻而逃上命捕之至是皇姑梁國公主請赦之上謂  
宰臣曰公主婦人不識曲法罪尚可恕摩多請託至此  
豈可貸宥不許戊午以右宣徽使靖等為賀宋正旦使  
甲子太白晝見戊辰以宿直將軍阿克占富勒呼為高  
麗生日使

十六年正月戊申朔宋高麗夏遣使來賀甲寅詔免去  
年被水旱路分租稅甲子詔宗屬未附玉牒者並與編  
次丙寅上與親王宰執從官從容論古今興廢事曰經

籍之興其來久矣垂教後世無不盡善今之學者既能誦之必須行之然知而不能行者多矣苟不能行誦之何益女直舊風最為純直雖不知書然其祭天地敬親戚尊者老接賓客信朋友禮意款曲皆出自然其善與古書所載無異汝輩當習學之舊風不可忘也戊辰宮中火庚午上按鷹高橋見道側醉人墮驢而卧命左右扶而乘之送至其家辛未皇姑邀上至私第諸妃皆從宴飲甚歡公主每進酒上立飲之二月庚寅皇子潘王

妃圖克坦氏以姦伏誅己亥平章政事圖克坦克寧罷  
以女故三月丙午朔日有食之是日萬春節改用明日  
宋高麗夏遣使來賀戊申雨豆於臨潢戊午上御廣仁  
殿皇太子親王皆侍膳上從容訓之曰大凡資用當務  
節省如其有餘可周親戚勿妄費也因舉所御服曰此  
服已三年未嘗更換尚爾完好汝等宜識之壬申復置  
烏都溫部圖哩四月丙戌詔京府設學養士及定宗室  
宰相子程試等第戊子制商賈舟車不得用馬以東京

留守崇尹為樞密副使壬寅如金蓮川五月戊申南京  
宮殿火甲寅太白晝見庚申遣使禱雨靜寧山神有頃  
而雨六月山東兩路蝗七月壬子夏津縣令伊喇算卓  
坐賊伏誅八月辛巳次霹靂灤九月乙巳至自金蓮川  
已酉諭左丞相赫舍哩良弼曰西邊自來不備儲蓄其  
令所在和糴以為緩急之備癸丑以殿前都點檢富察  
通等為賀宋生日使宿直將軍完顏朶果斯為夏國生  
日使諭左丞相良弼曰海陵非理殺戮臣下甚可哀憫

其博勒準等遺骸仰逐處訪求官為收葬辛酉以南京  
宮殿火留守轉運兩司官皆抵罪十月丙申詔諭宰執  
曰諸王小字未嘗以女直語命之今皆當更易卿等擇  
名以上十一月壬寅朔參知政事王蔚罷尚書省奏河  
北東路和倫明安所轄穆昆富珠哩色色以穆昆讓其  
兄子富色里上賢而從之仍令議加色色恩賞戊午以  
同知宣徽院事劉琬等為賀宋正旦使庚申以吏部尚  
書張汝弼為參知政事甲子以鈕祐祿罕努之子尚和

為尚輦局直長羅索為武器直長初罕努被旨招契丹  
達實後不知所終至是因展盤部長薩里罕托色等來  
詢之乃知其死節之詳故錄其後遣兵部郎中伊喇子  
元為高麗國生日使十二月壬申朔詔諸科人出身四  
十年方注縣今年歲太遠今後仕及三十二年別無負  
犯賊染追奪便與縣令丙子詔諸流移人老病者官與  
養濟上諭宰臣曰凡已經奏斷事有未當卿等勿謂已  
行不為奏聞改正朕以萬幾之繁豈無一失卿等但言



之朕當更改必無吝也庚寅定權場香茶罪賞法

十七年正月壬寅朔宋高麗夏遣使來賀高麗并表謝  
不納趙位寵丙午有司奏高麗所進玉帶乃石似玉者  
上曰小國無能辨識者誤以為玉耳且人不易物惟德  
其物若復却之豈禮體耶戊申詔於衍慶宮聖武殿西  
建世祖神御殿東建太宗睿宗神御殿詔西北路招討  
司契丹民戶其嘗叛亂者已行措置其不與叛亂及放  
良奴隸可徙烏庫哩實壘部令及春耕作尚書省奏烏

都溫部齊特庫爾阿勒瑪斯請入獻許之庚戌詔諸大臣家應請功臣號者既不許其子孫自陳吏部考功郎其詳考其勞績當賜號者即以聞壬子上謂宰臣曰宗室中年高者往往未有官稱其先皆有功於國朕欲稍加以官使有名位可稱如何對曰親親報功先王之令則丁巳詔朝官嫁娶給假三日不須申告壬戌詔宰臣海陵時大臣無辜被戮家屬籍沒者並釋為良遼豫王宋天水郡王被害子孫各葬於廣寧河南舊塋其後復

詔天水郡王親屬於都北安葬外咸平所寄骨殖官為  
葬於本處遼豫王親屬未入本塋者亦遷祔之三月辛  
丑朔宋高麗夏遣使來賀辛亥詔免河北山東陝西河  
東西京遼東等十路去年被旱蝗租稅賑東京博索哈  
斯罕三路乙丑尚書省奏三路之粟不能周給上曰朕  
嘗語卿等遇豐年廣糴者以備凶歉卿等皆言天下倉  
廩盈溢今欲賑濟乃云不給自古帝王皆以蓄積為國  
家長計朕之積粟豈欲獨用之耶今既不給可於鄰道

取之以濟自今預備當以為常四月甲戌制世襲明安  
穆昆若出仕者雖年未及六十欲令子孫襲者聽戊寅  
諭宰臣曰郡縣之官雖以罪解一二歲後亦須再用明  
安穆昆皆太祖創業之際於國勤勞有功之人其世襲  
官不宜以小罪奪免戊子以滕王府長史圖克坦烏哲  
為橫賜高麗使五月尚書省奏定皇家祖免以上親燕  
饗班次竝從唐制癸卯幸姚村淀閱七品以下官及宗  
室子諸局承應人射柳賞有差六月己卯謂宰臣曰朕

年老矣恐因一時喜怒處置有所不當卿等即當執奏  
母為面從成朕之失乙未以英王爽之子色瑋為忠順  
軍節度副使爽入謝上曰朕以卿疾故特任卿子所冀  
卿因喜而愈也欲即加峻授恐色瑋年幼未閑政事汝  
當訓之使有善可觀更當升擢七月壬子尚書省奏歲  
以羊三萬賜西北路戍兵上聞如何運致宰臣不能對  
上曰朕雖退朝留心政務不遑安寧卿等勿謂細事非  
帝王所宜問以卿等於國家之事未嘗用心故問之耳

是月大雨河決八月己巳觀稼于近郊壬申以監察御史體察東北路官吏輒受訟牒為不稱職笞之五十庚辰上謂宰臣曰今之在官者同僚所見事雖當理亦以為非意謂從之則恐人謂政非己出如此者多朕甚惡之今觀大理寺所斷雖制有正條理不能行者別具情見朕惟取其所長夫為人之理他人之善者從之則可謂善矣壬午上謂宰臣曰今在下僚豈無人材但在上者不為汲引惡其材勝己故耳丙戌上謂御史中丞赫

舍哩遜曰臺臣糾察吏治之能否務去其擾民且冀其  
得賢也今所至輒受訟牒聽其妄告使為政者如何則  
可九月丁酉朔日有食之辛丑封子永德為薛王以右  
副都點檢完顏實訥埒等為賀宋生日使癸卯以兵部  
郎中舒穆魯呼圖為夏國生日使戊申秋獵庚戌歲星  
熒惑太白聚於尾甲子還都十月己巳夏國進百頭帳  
詔却之境上癸酉有司奏衍慶宮所畫功臣二十人惟  
五人有謚今考檢餘十五人功狀擬定謚號以進詔可

詔以羊十萬付烏庫哩實疊部畜牧其滋息以予貧民  
丁丑制諸明安父任別職子須年二十五以上方許承  
襲辛巳上謂宰臣曰今在位不聞薦賢何也昔狄仁傑  
起自下僚力扶唐祚使既危而安延數百年之永仁傑  
雖賢非婁師德何以自薦乎癸未更護送罪人逃亡制  
上謂宰臣曰近觀上封章者殊無大利害且古之諫者  
既忠於國亦以求名今之諫者為利而已如戶部尚書  
曹望之濟南尹梁肅皆上書言事蓋覬覦執政耳其於



國政竟何所補達官如此況餘人乎昔海陵南伐太醫使祁宰極諫至戮於市此本朝以來一人而已丁亥上命宰臣曰監察御史田忠儒嘗上書言事當升擢以勵其餘十一月戊戌以南京留守圖克坦克寧為平章政事庚戌上謂宰臣曰朕常恐重斂以困吾民自今諸路差科之煩細者亦具以聞有司奏夏國進御帳使因邊臣懇求進入乃許之以尚書左丞石琚為平章政事丙辰以延安尹完顏富拉塔等為賀宋正旦使十二月戊

辰以渤海舊俗男女婚娶多不以禮必先攘竊以奔詔  
禁絕之犯者以姦論以宿直將軍布薩懷忠為高麗生  
日使已巳太白晝見壬申以尚書右丞唐古安禮為左  
丞殿前都點檢富察道為右丞上謂宰臣曰朕今年已  
五十有五若年踰六十雖欲有為而莫之能矣宜及朕  
之康強其女直人明安穆昆及國家政事之未完與夫  
法令之未一者宜皆修舉之凡所施行朕不為怠

十八年正月丙申朔宋高麗夏遣使來賀壬寅定殺異

居周親奴婢同居卑幼輒殺奴婢及妻無罪而輒毆殺者罪戾修起居注伊喇傑上書言每屏人議事雖史官亦不與聞無由紀錄上以問平章政事石琚左丞唐古安禮對曰古者天子置史官于左右言動必書所以儆戒人君庶幾有所畏也庚申免中都河北河東山東河南陝西等路前年被災租稅壬戌如春水二月丙寅朔次管莊丙子次華港己丑還宮三月乙未朔萬春節宋高麗夏遣使來賀己巳命戍邊女直人過祭祀婚嫁

節長許自造酒丁未上謂宰執曰縣令之職最為親民  
當得賢材用之邇來犯法者衆殊不聞有能者比在春  
水見石城玉田兩縣令皆年老苟祿而已畿甸尚爾遠  
縣可知平章政事石琚對曰良鄉令焦旭慶都令李伯  
達皆能吏可任上曰審如鄉言可推用之己酉禁民間  
無得勦興寺觀獻州人殷小二等謀反伏誅四月己巳  
上謂宰臣曰朕巡幸所至必令體訪官吏臧否向玉田  
知主簿舒穆魯杳能吏也可授本縣令己丑以太子左

贊善阿布哈德甫為橫賜高麗使五月丙午上如金蓮  
川六月庚午尚書左丞相赫舍哩良弼薨閏月辛丑命  
賑西南西北兩招討司民及烏庫哩寶壘部轉戶饑七  
月丙子上謂宰臣曰職官始犯賊罪客有錯誤至于再  
犯是無改過之心自今再犯不以賊數多寡並除名八  
月乙巳至自金蓮川丙辰以尚書右丞相完顏守道為  
左丞相平章政事石琚為右丞相九月辛未以大理卿  
張九思等為賀宋生日使侍御史完顏富勒呼為夏國

生日使癸酉以尚書左丞唐古安禮為平章政事乙亥  
以右丞富察通為左丞參知政事伊喇道為右丞刑部  
尚書鈕祜祿噶達爾為參知政事十月庚寅朔陝州防  
禦使舒穆魯錦嘉努以罪除名甲午御史中丞劉仲晦  
侍御史李瑜坐失糾察大長公主事削一階十一月庚  
申朔尚書省奏擬同知永寧軍節度使事額爾克為  
刺史占額爾克年幼未練事授佐貳官可也平章政事  
唐古安禮曰臣等以額爾克宗室故擬是職上曰郡守

係千里休戚安可不擇人而私其親邪若以親親恩賜與雖厚無害于政使之治郡而非其才一境何賴焉壬申以靜難軍節度使烏雅扎拉等為賀宋正旦使丙子尚書省察崇信縣令石安節買車材于部民三曰不償其直當削官一階解職上因言凡在官者但當取其貪污與清白之尤者數人黜陟之則人自知懲勸矣夫朝廷之政太寬則人不知懼太猛則小玷亦將不免于罪惟當用中典耳戊寅上責宰臣曰近問趙承元何故再

任卿等言曹王嘗遣人言其才能幹敏故再任之官爵擬注雖由卿輩子奪之權當出于朕曹王之言尚從之假皇太子有所諭則其從可知矣此事因卿言始知其不知者知復幾何且卿等公受請屬可乎蓋承元前為曹王府文學與王邸婢姦杖百五十除名而復用也丙戌以吏部尚書烏庫哩元忠為御史大夫以東上閣門使左光慶為高麗生日使十二月庚戌封孫烏達布溫國公瑪達格金源郡王承慶道國公壬子羣臣奉上大



金受命萬世之寶

十九年正月庚申朔宋高麗夏遣使來賀丁卯如春水  
二月己酉還宮乙卯免去年被水旱民田租稅三月己  
未朔萬春節宋高麗夏遣使來賀乙丑尚書省奏虧課  
院務官顏葵等六十八人各合削官一階上曰以承廕  
人主權沾此遼法也法弊則當更張唐宋法有可行者  
則行之己巳上與宰臣論史事且曰朕觀前史多溢美  
大抵史書載事貴實不必浮辭諂諛也辛未上謂宰臣

曰姦邪之臣欲有規求徃徃私其黨與不肯明言託以  
他事陽不與而陰為之力朕觀古之姦人當國家建儲  
之時恐其聰明不利于已徃徃風以陰事破壞其議惟  
擇昏懦者立之冀他日可弄權為功利也如晉武欲立  
其弟而姦臣沮之竟立惠帝以致喪亂此明驗也丁丑  
上謂宰臣曰朕觀前代人臣將諫于朝與父母妻子訣  
示以必死同列目覩其死亦不顧身又為之諫此盡忠  
于國者人所難能也已邠制糾彈之官知有犯法而不

舉者減犯人罪一等科之關親者許回避上謂宰臣曰  
人多奉釋老意欲徼福朕蚤年亦頗惑之旋悟其非且  
上天立君使之治民若盤樂怠忽欲以僥倖祈福難矣  
果能愛養下民上當天心福必報之四月己丑朔詔賑  
西南路招討司所部民己酉以升祔閔宗詔中外丁巳  
歲星晝見五月戊寅幸太寧宮六月戊子朔詔更定制  
條七月辛未有司奏擬趙王子寶古納人從上不從謂  
宰相曰兒輩尚幼若奉承太過使侈心滋大卒難節抑

此不可長諸兒每入侍當其語笑娛樂之際朕必淵默  
泣之以嚴庶其知朕教戒之意使常畏懼而寡過也癸  
酉密州民許通等謀反伏誅丙子太白晝見庚辰至  
自太寧宮八月壬辰尚書右丞相石琚致仕戊戌以宋太  
觀錢當五用丙午濟南民劉溪忠謀反伏誅九月戊午  
以左宣徽使富察鼎壽等為賀宋生日使太子左衛率  
府率費摩呼喇為夏國生日使癸亥秋獵癸未還都十  
月辛卯西南路招討使扎克丹以賊伏誅辛亥制知情

服內成親者雖自首仍依律坐之十一月壬戌改葬昭  
德皇后大赦以御史中丞伊喇慥等為賀宋正旦使戊  
辰以西上閣門使盧拱為高麗生日使壬申上如河間  
冬獵癸未至自河間

二十年正月甲寅朔宋高麗夏遣使來賀戊午定試令  
史格壬戌命歲以錢五千貫造隨朝百官節酒及冰蜀  
藥炭視品秩給之己巳如春水丙子幸石城縣行宮丁  
丑以玉田縣行宮之地偏林為御林大定樂為長春淀

二月丁未還都三月癸丑朔萬春節宋高麗夏遣使來  
賀已未詔有犯罪被問官雖遇災不得復職乙丑以新  
定明安穆昆詔免中都西京河北山東河東陝西路去  
年租稅辛巳以平章政事圖克坦克寧為尚書右丞相  
御史大夫烏庫哩元忠為平章政事四月丁亥定冒廢  
罪賞已亥制宗室及外戚并一品命婦衣服聽用明金  
以西上閤門使郭喜國為橫賜高麗使太寧宮火乙  
巳上謂宰相曰女直官多謂朕食用大儉朕謂不然夫一

食多費豈為美事况朕年高不欲屠宰物命貴為天子  
能自節約亦不惡也朕服御或舊常使澣濯至于破碎  
方始更易向時帳幕常用塗金為飾今則不爾但令足  
用何必事紛華也庚戌如金蓮川五月丙寅京師地震  
生黑白毛七月旱八月壬午秋獵九月壬戌至自金蓮  
川以太府監李侂等為賀宋生日使少府少監薩布為  
夏國生日使丙子布沙堪羣牧羅和謀叛伏誅十月庚  
辰朔更定銓注縣令丞簿格詔西北路招討司每進馬

馳鷹鷂等輒率歛部內自今竝罷之壬午上謂宰臣曰  
察問細微非人君之體朕亦知之然以卿等殊不用心  
故時或察問如山後之地皆為親王公主權勢之家所  
占轉租于民皆由卿等之不察卿等當盡心勤事毋令  
朕之煩勞也詔徙約羅河伊瑪河兩明安于大名東平  
等路安置戊戌上謂宰臣曰凡人在下位欲冀升進勉  
為公廉賢不肖何以知之及其通顯觀其施為方見本  
心如招討扎克丹初任定州同知繼為都司未嘗少有



私徇所至有清名及為招討不固守人心險于山川誠  
難知也壬寅上謂宰臣曰近覽資治通鑑編次累代廢  
興甚有鑒戒司馬光用心如此古之良史無以加也校  
書郎毛麾朕屢問以事善應對真該博老儒可除太常  
職事以備討論甲辰以殿前都點檢襄為御史大夫十  
一月丁巳尚書右丞伊喇道罷乙丑以真定尹圖克坦  
守素等為賀宋正旦使癸酉以御史大夫襄為尚書右  
丞乙亥上諭宰臣曰郡守選人資考雖未及廉能者則

升用之以勵其餘以太常少卿任侗為高麗生日使十  
二月辛巳上謂宰臣曰岐國用人但一言合意便升用  
又言失便責罰之凡人言辭一得一失賢者不免  
自古用人咸試以事若止以奏對之間安能知人賢否  
朕之取人衆所與者用之不以獨見為是也已亥河決  
衛州辛丑獵于近郊癸卯特授襲封衍聖公孔總兗州  
曲阜令封爵如故

金史卷七